


書名 廣文選八十二卷 嘉靖
十二年序刊本
撰者 明 劉節 輯
卷 卷五十六
內容分類 集-總集-詩文
索書號 大木-集部-總集類-3

卷五十六



廣文選卷第一

編號 D7920300

彩色首頁1

東洋文化研究所漢籍目錄 編號: D7920300

東洋文化研究所漢籍目錄所藏漢籍善本文影像資料庫 索書號: 大木-集部-總集類-3

漢籍善本文影像資料庫文本 廣文選八十二卷 嘉靖十二年序刊本

版權所有: 東京大學 東洋文化研究所

使用上的注意事項

天地廣

天地賦

成公子安



明通議大夫都察院右副都御史大庾劉節廣

惟自然之初載兮道虛無而玄清太素紛以溷淆兮始
有物下而混成何元一之芒昧兮廓開闢而著形爾乃清
濁剖玄黃判離太極既殊是生兩儀星辰煥列日月
重規以尊地靜以卑昏明迭炤或盈或虧陰陽協
氣而寒暑隨時而推移三才殊性五行異位千變
萬化庶類授之以形稟之以氣色表文采聲有音
方流形品物鼓以雷霆潤以慶雲八風翱翔

廣文選卷第五十六

明通議大夫都察院右副都御史大庾劉節廣

設論下

釋譏

邵令先

或有譏余者曰聞之前記夫事與時並名與功偕然則
名之與事前哲之急務也是故創制作範匪時不立流
稱垂名匪功不記名必須功而乃顯事亦後時以行止
身沒名滅君子所耻是以達人研道探頤索微觀天運
之符表考人事之盛衰辯者馳說智者應機謀夫演略
武士奮威雲合霧集風激電飛量時揆宜用取世資小
屈大申存公忽私雖尺枉而尋直終揚光以發輝也今
三方鼎峙九有未乂悠悠四海嬰寸禍敗嗟道義之沈

塞愍生民之顛沛此誠聖賢極教之秋烈士樹功之會也吾子以高朗之才珪璋之質兼覽博闡留心道術無遠不致無幽不悉挺身取命幹茲奧秘躊躇紫闥喉舌是執九考不移有入無出究古今之真偽計時務之得失雖時獻一策偶進一言釋彼官貴慰此素殮固未能輸竭忠款盡瀝胃肝排方入直惠彼黎元俾吾徒草鄙並有聞焉也蓋亦緩衡轡回軌易塗與安駕肆思馬斯徂審厲揭以投濟要夷庚之赫撫播秋蘭以芳世副吾徒之彼圖不亦盛與余聞而歎曰嗚呼有若云乎邪夫人心不同實若其面子雖光麗既美且艷管闕篴舉守厥所見未可以言八絃之形坪信萬事之精練也或人率爾仰而揚衡曰是何言與是何言與余應之曰虐帝以面從爲戒孔聖以悅已爲尤若子之言良我所思也爲吾子論而釋之昔在鴻荒朦昧肇初三皇應錄五帝承符爰暨夏商前典攸書姬衰道缺霸者異扶羸氏慘虐吞爵八區於是從橫雲起徂詐如星竒邪蠶動智故萌生或飾真以讎僞或挾邪以干榮或詭道以要上或鬻技以自矜背正崇邪棄直就佞忠無定分義無常經故鞅法窮而慝作斯義敗而姦成呂門大而宗滅韓辯立而身刑夫何故哉利回其心寵耀其目赫赫龍章鑠鑠車服媮幸苟得如反如反滔邪荒迷恣睢自極和鸞未調而身在轅側庭宇未踐而棟折榱覆天收其精地縮其澤人吊其躬鬼芟其額初升高岡終隕幽壑朝含榮潤夕爲枯魄是以賢人君子深圖遠慮畏彼咎戾超

然高舉寧曳尾於塗中穢濁世之休譽彼豈輕主慢民而忽於時務哉蓋易著行止之戒詩有靖恭之歎乃神之聽之而道使之然也自我大漢應天順民政治之隆皓若陽春俯憲坤典仰式乾文播皇澤以熙世揚茂化之醲醇君臣履度各守厥真上垂詢納之弘下有匡救之責士無虛華之寵民有一行之迹粲乎疊疊尚此忠益然而道有隆窳物有興廢有聲有寂有光有翳朱陽否於素秋玄陰抑於孟春羲和逝而望舒係運氣匿而耀靈陳冲質不永桓靈墜敗英雄雲布豪傑蓋世家挾殊議人懷異計故從橫者歛披其曾祖詐者暫吐其舌也今天綱已綴德樹西隣丕顯祖之宏規縻好爵於士人與五教以訓俗豐九德以濟民肅明祀以初祭幾皇道以輔真軌時者未一僞者未分聖人垂戒蓋均無故君臣協美於朝黎庶欣戴於野動若重規靜若疊矩濟濟備彥元凱之倫也有過必知顏子之仁也侃侃庶政冉季之治也鷹揚鷲騰伊望之事也總羣俊之上略含薛氏之三計敷張陳之祕策故力征以勤世援華英而不違豈暇修枯籜於榛穢哉然吾不才在朝累紀託身所天心焉是恃樂滄海之廣深歎嵩嶽之高峙聞仲尼之替商感鄉校之益已彼平仲之和羨亦進可而替否故矇冒瞽說時有攸獻譬適人之有采於市閭游童之吟詠乎疆畔庶以增廣福祥輸力規諫若其合也則以闇協明進應靈符如其違也自我常分退守已愚進退任數不矯不誣循性樂天夫何恨諸此其所以旣入

不出有而若無者也狹屈氏之常醒濁漁父之必醉溷
柳季之卑辱福夷叔之高對合不以得違不以失得不
充訕失不慘悻不樂前以顧軒不就後以慮輕不粥譽
以于澤不辭愆以忌紂何責之釋何殮之卹何方之排
何責之入九考不移固其所執也方今朝士山積髦俊
成羣猶鱗介之潛乎巨海毛羽之集乎鄧林游禽逝不
爲之歎浮魴臻不爲之殺且陽靈幽於唐葉陰精應於
商時陽旰請而洪災息桑林禱而甘澤滋行止有道啓
塞有期我師遺訓不怨不尤委命恭已我又何辭辭窮
路單將反初節綜墳典之流芳尋孔氏之遺藝綴微辭
以存道憲先軌而投制違叔胙之優游美踈氏之遐逝
收止足以言歸汎浩然以容畚欣環堵以恬媿免咎悔
於斯世顧茲心之未泰懼未塗之泥滯仍求激而增憤
肆中懷以告誓昔九方考精於至貴秦牙沈思於殊形
薛燭察寶以飛譽瓠梁託弦以流聲齊隸拊髀以濟文
楚容潛寇以保荆雍門援琴而挾說韓哀秉轡而馳名
盧敖翱翔乎玄闕若士竦身於雲清余實不能齊技於
數子故乃靜然守已而自寧

玄居釋

束廣徵

束子閑居門人並侍方下帷深譚隱机而吟含毫散藻
考撰同異在側者進而問之曰蓋聞道尚變通達者無
窮世亂則救其紛時泰則扶其隆振天維以贊百務熙
帝載而鼓皇風生則率土樂其存死則宇內哀其終是
以君子屈已伸道不耻于時上國有不索何獲之言周

易著躍以求進之辭辛老負金絃以陳烹割之說齊客
當康衢而咏白水之詩今先生耽道修藝疑然山峙潛
稔不墮其志鱗翼成而愈伏術業優而不試乃欲闔匱
辭價泥蟠深處求戢琳琅之耀匿首窮魚之渚當唐年
而慕長沮邾有道而反甯武識彼迷此愚竊不取若乃
士以援登進必待求附執之黨橫擢則林藪之彥不抽
丹墀步紈袴之童東野遺白顛之叟蓋亦因子都而事
博陸憑鵠首以涉洪流蹈翠雲以駭逸龍振光耀以驚
沈鱗徒屈靈蟠於埴井眇天路而不遊學旣積而自困
夫何爲乎祕丘且歲不我與時若奔駟有來無反難得
易先生不知肝豫之識悔遲而忘夫朋盍之義務疾

亦豈海濱而抑東流之水臨虞泉而招西歸之日徒以

曲畏爲桔儒學自桎囚大道於環堵苦形骸於蓬室豈
若託身權戚馮執假力擇棲芳林飛不待翼七娥
之房朝享五鼎之食正則大階平贊五教而王繩
直孰若茹藿食蔬終身自匿哉東子曰居吾將導爾以
君子之道論爾以出處之事爾其明受余訊謹聽余志
昔元一旣啓兩儀肇立離光夜隱望舒晝戢羽族翔林
蠖蛸赴濕物從性之所安士樂志之所執或背豐榮以
巖栖或排蘭闥而求入在野者龍逸在朝者鳳集雖其
軌迹不同而道無貴賤必安其業交不相羨稷契奮庸
以宣道巢由洗耳以避禪同垂不朽之稱俱入賢之者
之流參名比譽誰劣誰優何必貪與二八羣而耻爲七

人之疇乎且道睽而通士不同趣吾竊綴處者之未行
未敢聞子之高喻將忽蒲輪而不眄夫何權威之云附
哉昔周漢中衰時難自託福兆既開患端亦作朝遊魏
峩之宮夕墜崢嶸之壑書契夜歎晨華暮落忠不足以
衛已過不可以預度是士諱登朝而競赴林薄或毀名
自汙或不食其祿比從政於匣笥之龜譬官者於郊廟
之犢公孫泣涕而辭相楊雄抗論於赤族今大晉熙隆
六合寧靜蜂蠱止毒熊羆輟猛五刑勿用八絃備整主
無驕肆之怒臣無羗纓之請上下相安率禮從道朝養
觸邪之獸庭有指佞之草禍戮可以忠兆寵祿可以順
保且夫進無險懼而惟寂之務者率其性也兩可俱是
而舍彼趣此者從其志也蓋無爲可以解天下之紛瘡
消可以救國家之急當值者事有所窮陳策者言有不
入翟璜不能回西隣之旼平勃不能正如意之立干木
卧而秦師退四皓起而戚姬泣夫如何舍何執何去
何就謂山岑之林爲芳谷底之莽爲臭守分任性唯天
所授鳥不假甲於龜魚不借足於獸何必笑孤竹之貧
而羨齊景之富耻布衣以肆志寧文裘而拖繡且能約
其躬則儋石之穡以豐苟肆其欲則海陵之積不足存
道德者則匹夫之身可榮忘大倫者則萬乘之主猶辱
將研六籍以訓世守寂泊以鎮俗偶鄭老於海隅匹嚴
叟於僻蜀且世以大虛爲興玄鑪爲肆神遊莫競之林
心存無營之室榮利不擾其覺殷憂不干其寐捐夸者
之所貪收躁務之所棄雍聖籍之荒蕪總群言之一至

企素履於丘園背纓綬而長逸請子課吾業於千載無聽吾言於今日也

對儒

曹輔佐

或問曹子曰夫寶以含珍為貴士以藏器為峻麟以絕迹標竒松以負霜稱雋是以蘭生幽澗玉輝千仞故子州浮滄瀾而龍蟠吳季忽萬乘以解印虞公潛崇巖以願神梁生適南越以保慎固能全真養和夷迹洞潤陵冬揚芳披雪獨振也今子少晞冥風弱挺秀容竒發幼齡翰披孺童吐辭則藻落揚班抗心則志擬高鴻味道則理貫莊肆研妙則賴奪豪鋒固以騰廣莫而萋藉排素薄而青葱者矣何必以刑禮為已任申韓為宏通既

登東觀漢記史筆又據太學字理需功曾無玄韻淡自免氣

龍不營練真之術不慕內聽之聰而處汎位以栳物扇塵教以自濛負鹽車以顯能飾一已以求恭退不居漆園之場出不躡曾城之衝游不踐綽約之室趨不希駮駟之蹤徒以區區之懷而整名目之典覆蕢之量而塞北川之洪檢名實於俄頃之間定得失乎一管之鋒子若謂是果是邪則是不必以合俗子若云俗果非邪則俗非不可以苟從俗我紛以交爭利害渾而彌重何異執朽轡以御逸駟承勁風以握秋蓬役恬性以克勞府對羣物以耦怨雙者乎子不聞乎終軍之賴賈生之才技竒山東玉映漢臺可謂響播六合聲駭嬰孩而見毀絳灌之口身離狼狽之災由此言之名為實實福萌禍

胎朝敷榮華夕歸塵埃未若澄虛心於玄圃陰瑤林於
蓬萊絕世事而偶黃綺鼓滄川而浪龍鰓者矣蒙竊惑
焉主人煥耳而笑欣然而言曰夫兩儀既闢陰陽汗浩
五才迭用化生紛擾萬類云云孰測其兆故不登閭風
安以瞻殊目之形不步景宿何以觀恢廓之表是以迷
麓者循一往之智狷介者守一方之矯豈知火林之蔚
炎柯氷津之擢陽草故大人達觀任化昏曉出不極勞
處不巢皓在儒亦儒在道亦道運屈則紆其清暉時申
則散其龍藻此蓋員動之用舍非尋常之所寶也今三
明玄照二氣載宜玄教夕疑朗風晨鮮道以才暢化隨
理全故三典剋明於百揆虞音齊響於五絃安期解褐
於秀林漁父擺釣於長川如斯則化無不融道無不延
風澄於俗波清于川方將無黃軒於慶雲招儀鳳於靈
山流玉醴乎華闈秀朱草於庭前何有違理之患累真
之嫌子徒知辯其說而未測其源明朝菌不可踰晦朔
蟪蛄無以觀大年固非管翰之所述聊敬對以終篇

應譏

陳孔璋

客有譏余者云聞君子動作周旋無所苟而已矣今主
君鍾陰陽之美總賢聖之風固非世人所能及遭豺狼
肆虐社稷隕傾既不能抗節服義與主存亡而背枉違
難耀茲武功徒獨震撲山東剝落元元結疑本朝假拒
羣姦使已蒙嚙沓之謗而他人受討賊之勲捐功棄力
以德取怨今賤文德而貴武勇任權譎而背舊章無乃
非至德之純美而有闕於後人哉主人曰是何言也夫

兵之設亦九矣所以威不軌而懲淫慝也夫申鳴違父
樂羊食子季友鳩兄周公戮弟猶忍而行之王事所不
得已也而况將避讒慝之嫌棄社稷之難愛暫勞之民
忘求康之樂此庸夫猶所不爲何有冠世之士哉昔洪
水滔天汎濫中國伯禹躬之過門而不入率萬方之民
致力乎溝洫及至蕭韶九成百獸率舞垂拱無爲而天
下晏如夫豈前好勤而後媮樂乎蓋以彼勞求斯逸也
夫世治責人以禮世亂則考人以功斯各一時之宜故
有論戰陣之權於清廟之堂者狂矣陳俎豆之噐於城
濮之墟者則悖矣是以達人君子必相時以立功必揆
宜以處事孝靈旣喪媛官放禍棟臣殘酷宮室焚火主
君乃及凶族夷惡醜蕩滌朝姦清澄守職也旣乃卓爲
封地幽耀帝后強以暴國非力所討違而去之宜也
故天贊人和無思不至用能合師百萬若運諸掌者義
也今主君以寬弘爲宇仁惠爲廬若地之載如天之燾
故當其聞管籥之聲則恐已之病也見羽旄之美則懼
士之勞也察稼穡之不特推民墮也臨臺觀之崇高則
恤役之病也是以虚心恭已取人之謨闢四門廣諫路
貴讜言賤巧僞慮不專行功不擅美咨事若不及求譽
恐不聞用能使賢智者盡其策勇敢者竭其身故舉無
遺闕而風烈宿宣也

卜疑集

嵇叔夜

有宏達先生者恢廓其度寂寥疏闊方而不制廉而不
割超世獨步懷玉被褐交不苟合仕不期達常以爲忠

信篤敬直道而行之可以居九夷遊八蠻浮滄海踐河源甲兵不足忌猛獸不爲患是以機心不存泊然純素從容縱肆遺忘好惡以天道爲一指不識品物之細故也然而大道旣隱智巧滋繁世俗膠加人情萬端利之所在若鳥之追鸞富爲積蠹貴爲聚怨動者多累靜者鮮患爾乃思丘中之隱士樂川上之執竿也於是遠念長想超然自失郢人旣沒誰爲吾質聖人吾不得見異聞之於數術乃適太史貞父之廬而訪之曰吾有所疑願子卜之貞父乃危坐操著拂几陳龜曰君何以命之先生曰吾寧發憤陳誠謹言帝庭不屈王公平將卑懦委隨承旨倚靡爲面從乎寧愷悌弘覆施而不德乎將進趨世利苟容偷合乎寧隱居行義推至誠乎將崇飾矯誣養虛名乎寧斥逐凶佞守正不傾明否臧乎將傲倪滑稽挾智任術爲智囊乎寧與王喬赤松爲侶乎將進伊摯而友尚父乎寧隱鱗藏彩若淵中之龍乎寧舒翼揚聲若雲間之鴻乎寧外化其形內隱其情屈身墮時陸沉無名雖在人間實處冥冥乎將激昂爲清銳思爲精行與世異心與俗并所在必聞恒營營乎寧寥落間放無所矜尚彼我爲一不爭不讓遊心皓素忽然坐忘追羲農而不及行中路而惆愴乎將慷慨以爲壯感槩以爲亮上千萬乘下凌將相尊嚴其容高自矯抗常如失職懷恨快快乎寧聚貨千億擊鐘鼎食枕藉芬芳婉孌美色乎將苦身竭力剪除荆棘山居谷飲倚巖而息乎寧如伯奮仲堪二八爲偶排擯共鯨令失所乎將

如箕山之夫潁水之父輕賤唐虞而笑大禹乎寧如泰山之隱德潛讓而不揚乎將如季札之顯節義慕爲子臧乎寧如老聃之清淨微妙守玄抱一乎將如莊周之齊物變化洞達而放逸乎寧如夷吾之不彘束縛而終在霸功乎將如魯連之輕世肆志高談從容乎寧如市南子之神勇四固山淵其志乎將如毛公蘭生之龍驤虎步慕爲壯士乎此誰得誰失何凶何吉時移俗易好貴慕名臧文不讓位於柳季公孫不歸美於董生賈誼一當於明主絳灌作色而揚聲况今千龍並馳萬驥征紛紛交競逝若流星敢不惟思謀於老成哉太史貞父曰吾聞至人不相達人不上若先生者文明在中見素表璞內不馳心外不負俗交不爲利仕不謀祿鑿乎古今滌情蕩欲夫如是呂梁可以遊湯谷可以浴方將觀大鵬於南溟又何憂於人間之委曲

客傲

郭景純

客傲郭生曰王以兼城爲寶士以知名爲賢明月不妄映蘭葩豈虛鮮今足下旣以拔文秀於叢蒼陰弱根於慶雲陵扶搖而竦翮揮清瀾以濯鱗而響不徹於一臯價不登乎千金傲岸榮悴際頡頏龍魚之間進不爲諧隱退不爲放言無沈冥之韻而希風乎嚴光徒費思於鑽味摹洞林乎連山尚何名乎攀驪龍之髯撫翠禽之毛者而不得絕霞肆跨天津者未之前聞也郭生粲然而笑曰鷦鷯不可與論雲翼并蛙難與量海鼈雖然將祛子之惑訊以未悟其可乎乃者地維中絕乾光墜采

皇運暫回廊祚淮海龍德時乘羣才雲駭藹若鄧林之
會逸翰爛若溟海之納奔濤不煩咨嗟之訪不假蒲帛
之招羈九有之竒駿咸總之於一朝豈惟豐沛之英南
陽之豪昆吾挺鋒驪驪軒髦杞梓競敷蘭蕙爭翹嚶聲
冠於伐木援類繁乎拔茅是以水無浪士巖無幽人刈
蘭不暇爨桂不給安事錯薪乎且夫窟泉之潛不思雲
暈熙冰之采不羨旭晞混光耀於埃藹者亦曷願滄浪
之深秋陽之映乎登降紛於九五淪湧懸乎龍津蚶蛾
以不才陸槁蟒蛇以騰驚暴鱗連城之寶藏於褐裏三
秀雖豔糜于麗采香惡乎芬賈惡乎在是以不塵不冥
不驪不駢支離其神蕭悴其形形廢則神王迹迹麗而
名生體全者爲犧至獨者不孤傲俗者不得以自得默
覺者不足以涉無故不恢心而形遺不外累而智喪無
巖穴而冥寂無江湖而放浪玄悟不以應機洞鑒不以
昭曠不物物我我不是是非非忘意非我意意得非我
懷寄羣籟乎無象域萬殫於一歸不壽殤子不夭彭涓
不壯秋豪不小太山蚊淚與天地齊流蜉蝣與大椿齒
年然一闕一開兩儀之迹一冲一溢懸象之節渙沍期
於寒暑凋蔚要乎春秋青陽之翠秀龍豹之委頰駿狼
之長暉玄陸之短景故臯壤爲悲欣之府胡蝶爲物化
之器矣夫欣黎黃之音者不類甲蟪蛄之吟豁雲臺之
觀者必悶帶索之歡縱蹈而詠採薺擁壁而歎抱關戰
機心以外物不能得意於一弦悟往復於嗟歎安可與
言樂天者乎若乃莊周偃蹇於漆園老萊嬾娑於林窟



嚴平澄漠於塵肆梅真隱淪乎市卒梁生吟嘯而矯迹
焦先混沌而槁杌阮公昏酣而賣傲翟叟遯形以倏忽
吾不幾韻於數賢故寂然玩此員策與智骨

釋勸論

皇甫士安

客曰蓋聞天以懸象致明地以含通吐靈故黃鍾次序
律呂分形是以春華發萼夏繁其實秋風逐暑冬冰乃
結人道以之應機乃發三材連利明若符契故士或同
升於唐朝或先覺於有莘或通夢以感主或釋釣於渭
濱或叩角以干齊或解褐以相秦或冒謗以安鄭或乘
駟以救屯或班荆以求友或借術於黃神故能電飛景
拔超次邁倫騰高聲以奮遠抗宇宙之清音由此觀之
進德貴乎及時何故屈此而不伸今子以英茂之才游
精於六藝之府散意於衆妙之門者有年矣既遭皇禮
之朝又投祿利之際委聖明之主偶知己之會時清道
真可以冲邁此真吾生濯髮雲漢鴻漸之秋也韜光逐
藪含章未曜龍潛九泉磴然執高棄通道之遠由守介
人之局操無乃乖於道之趣乎且吾聞招搖昏迴則天
位正五教班叙則人理定如今王命切至委慮有司上
招迓主之累下致駭衆之疑達者貴同何必獨異羣賢
可從何必守意方今同命並臻饑不待食振藻皇塗咸
秩天官子獨栖遲衡門放形世表遜遯丘園不睨華好
惠不加人行不合道身嬰天疾性命難保若其義和促
轡大火西頽臨川恨晚將復何階夫貴陰賤璧聖所約
也顛倒衣裳明所箴也子其鑒先哲之洪範副聖朝之

虛心冲靈翼於雲路浴天池以濯鱗排閭闔步玉岑登
紫闥侍北宸翻然景曜雜沓英塵輔唐虞之主化堯舜
之人宣刑錯之政配殷周之臣銘功景鍾叅叙彝倫存
則鼎食亡爲貴臣不亦茂哉而忽金白之輝曜忘青紫
之班璘辭容服之光粲抱弊褐之終年無乃勤乎主人
笑而應之曰吁若賓可謂習外觀之暉暉未覩幽人之
髣髴也見俗人之不容未喻聖皇之兼愛也循方圓於
規矩未知大形之無外也故曰天玄而清地靜而寧含
羅萬類旁薄群生寄生聖世託道之靈若夫春以陽散
冬以陰凝泰液含光元氣混蒸衆品仰化誕制殊徵故
進者享天祿處者安丘陵是以寒暑相權四宿代中陰
陽不治運化無窮自然分定兩克厥中二物俱靈是謂



大同彼此無怨是謂至通若乃衰周之末貴詐賤誠牽
於權力以利要榮故蘇子出而六主合張儀入而橫勢
成廉頗存而趙重樂毅去而燕輕公叔沒而魏敗孫臏
刑而齊寧蠡種親而越霸屈子踈而楚傾是以君無常
籍臣無定名損義放誠一虛一盈故馮以彈劍感主女
有反賜之說項奮拔山之力蒯陳鼎足之勢東郭劫於
田榮顏闔耻於見逼斯皆棄禮喪真苟榮朝夕之急者
也豈道化之本與若乃聖帝之創化也叅德平二皇齊
風乎虞夏欲温温而和暢不欲察察而明切也欲混混
若玄流不欲蕩蕩而名發也欲索索而條解不欲契契
而繩結也欲芒芒而無垠際不欲區區而分別也欲闡
然而內章不欲示白若冰雪也欲醇醇而任德不欲瑣

瑣而執法也是以見機者以動成好遯者無所迫故曰
一明一昧德道之槩一弛一張合禮之方一浮一沈兼
得其真故上有勞謙之愛下有不名之臣朝有聘賢之
禮野有遯竄之人是以支伯以幽疲距唐李老寄迹於
西隣顏氏安陋以成名原憲娛道於至貧榮期以三樂
感尼父黔婁定市於布衾干木偃息以存魏荆萊志邁
於江岑君平因著以道著四皓潛德於洛濱鄭真躬耕
以致譽幼安發令乎今人皆持難奪之節軌不廻之意
遭救俗之主全彼人之志故有獨定之計者不借謀於
衆人守不動之安者不假慮於羣賓故能棄外親之華
通內道之真去顯顯之明路入昧昧之埃塵宛轉萬情
之形表排託虛寂以寄身屈無事之宅交釋利之人輕
若鴻毛重若泥沈損之不得測之愈深真吾徒之師表
余迫疾而不能及者也子議吾失宿而駭衆吾亦慳子
較論而不折中也夫才不周用衆所斥也寢疾彌年朝
所棄也是以胥克之廢丘明列馬伯牛有疾孔子斯歎
若黃帝創制於九經岐伯剖腹以蠲腸扁鵲造號而尸
起文摯狗命於齊五醫和顯術於秦晉倉公發祕於漢
皇華佗存精於獨識仲景垂妙於定方徒恨生不逢乎
君人故乞命訴乎明王求絕編於天錄亮我躬之辛苦
冀微誠之降霜故俟罪而窮處

詞

古黃澤辭

黃之隄其馬歎沙黃人威儀黃之澤其馬歎玉皇人壽

殺

絕命辭

息子微

玄雲決鬱將安歸兮鷹隼橫厲鸞徘徊兮矰若浮焱動
 則機兮叢棘棧棧曷可棲兮發忠亡身自繞罔兮寃頸
 折翼庸得往兮涕泣流兮萑蘭心結憎兮腸肝虹蜺曜
 兮日微孽杳冥兮未聞痛入天兮嗚呼寃際絕兮誰語
 仰天高兮自別招上帝兮我察秋風為我陰浮雲為我
 陰嗟若是兮欲何留撫神龍兮盥其頤游曠迥兮反亡
 期雄失據兮世我思

廣文選卷第五十六

廣文選卷第五十七

明通議大夫都察院右副都御史大庾劉節廣

序一

自序

司馬子長

昔在顓頊命南正重以司天北正黎以司地唐虞之際
 紹重黎之後使復典之至于夏商故重黎氏世序天地
 其在周程伯休甫其後也當周宣王時失其守而為司
 馬氏司馬氏世典周史惠襄之間司馬氏去周適晉晉
 中軍隨會奔秦而司馬氏入少梁自司馬氏去周適晉
 分散或在衛或在趙或在秦其在衛者相中山在趙者
 以傳劔論顯崩隤其後也在秦者名錯與張儀爭論於
 是惠王使錯將伐蜀遂拔因而守之錯孫靳事武安君